

**Uunga siunnersuut: Sanaartorfissagissaaneq, pisortat kuuffeqarfinnut aqqusersuutaat
aamma pisortat aqqusiniutaat pillugit Inatsisartut inatsisissaattut siunnersuut nr. xx,
dd.mm.2010-imeersoq**

(Ineqarnermut, Attaveqarnermut Angallanermullu Naalakkersuisumit saqqummiunneqartoq)

pillugu

Attaveqarnermut Ineqarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Justus Hansen, formand, Demokraatit
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Kaali Olsen, Inuit Ataqtigiit
Inatsisartunut ilaasortaq Anders Olsen, Siumut
Inatsisartunut ilaasortaq Malik Berthelsen, Siumut

Ataatsimiititaliap siunnersuut UKA 2010-mi ulloq 23. september 2010-mi
siullermeerneqareermat misissorpaa.

Siunnersuutip imaa siunertaalu:

Sanaartorfigissaanermut tunngasut malittarisassiuunnissaat siunnersuummi
siunertarineqarpoq, isumaqatigiissut 1998-imeersoq (sanaartorfigissaanermut
isumaqatigiissut) malillugu taakku massakut taamaallaat iluarsivigineqartarmata.
Taamaalilluni tamanna immikkut inatsisiliunneqarnissaanik kommunit kissaataat
siunnersuutikkut taparserneqarpoq.

Siusinnerusukkut Namminersornerullutik Oqartussat aamma Kommunit Kattuffiata
(kanukokap) akornanni 1997-imut aningaasanut inatsimmut tunngatillugu nalaagaaffiup
tapiissutai pillugit isumaqatiginninniarnit nalaani sanaartorfigissaneq pillugu suliasat

nammatassallu agguataarnissaat pillugu nutaamik isumaqatigiissuteqarnikkut isumaqatigiissutigineqarpoq.

Siunnersuut aqutigalugu pisortat kuuffeqarfinnut aqquersuutaat aamma pisortat aqquiniutaat pillugit suliassat nammatassallu agguataarneqarnerat matumuuna inatsisiliuunneqarput. Namminersorlutik Oqartussat pisortatut oqartussaapput najukkanilu oqartussaaneq kommunalbestyrelsit suliarisarpaat.

Sanaartorfigissaanermut akiliutip naatsorsornissaa inatsisissatut siunnersuummi § 12, imm. 2 tunngavigalugu aalajangersarneqarsimasoq aamma agguataarinnermut najoqqutassaq kommunit pilersaarusiorderanni imaluunniit akiliut tamanut atuuttoq ikiorsiullugu naatsorsorneqarsinnaasoq ataatsimiititaliap maluginiarpaat.

Inatsisartut inatsisaata siullermeerlugu oqaluuserineqarnera

Siunnersuutip siullermeerlugu oqaluuserineqarnerani siunnersuut Inatsisartuni partiinit tamanit annertuumik tapersorsorneqarpoq. Pisortat kuuffeqarfinnut aqquersuutaat aamma pisortat aqquiniutaat pillugit oqartussatut inatsisimanerit siullermeersumik erseqqissumik nassuiarneqarnerat partiit tamarmik naammagisimaarnerarpaat.

Sanaartorfigissaanermulli kommunit akileeqquneqarsinnaanerat pissusissamisoornersoq isumaliutigineqartariaqartoq Atassut isumaqarpoq, aningaasatigummi nammatassat annertuallaalerpata innuttaasut pilersaarutiminnik naggataatigut piviusunngortitsinngitsoorsinnaammata.

Siunnersuutip aningaasaqarnikkut allaffissornikkullu kingunissai:

Akileeqqusinissamat malittarisassat inatsisissatut siunnersuummi aalajangersarneqareermata sanaartorfigissaanermut akiliutinik akileeqqusisarneq siunnersuutikkut oqilisaaffigineqarnissaa naatsorsuutigineqartoq ataatsimiititaliap maluginiarpaat.

Aammattaaq inatsisissatut siunnersuutip aningaasaqarnikkut kinguneqarnissaa naatsorsuutigineqanngitsoq ataatsimiititaliap maluginiarpaat, sanaartorfigissaaneq pillugu isumaqatigiissummi atuuttumi allaffissornikut periaatsit siunnersuummi ingerlateqqiinnarneqarmata.

Attaveqarnermut Ineqarnermullu Ataatsimiititaliap inassuteqaatai

Ataatsimiititaliap isumaqatigiittup inatsisissatut siunnersuut akuersissutigineqassasoq **inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Justus Hansen, Siulittaasoq

Aqqaluaq B. Egede

Anders Olsen

Kaali Olsen

Malik Berthelsen